

TERZ MOND

Honduras: ena Surmirana e la sia tgesa d'unfants

Gl'è davanto en pensum per la veta



Mintga unfant vign tar Patricia Scarpatetti cun igls sies chitos e plascheirs ed an tot ègl 32 unfants.

● **pb.** Ed oz ainten la terza e davosa part vasainsa tge angaschamaint tgi dovra dad avoir permanent 32 unfants a cutier ed a meisa ed avoir la responsablada per els. Ed alloura anc digls metter sen ena buna veia cura tgi els davaintan carschias.

3. part (3/3)

«I vignan cun tot tar me...»

Damais 32 unfants èn da tgesa tar Patricia Scarpatetti. Vot deir els maglian, dorman, fon tarmagls, sa tgipliteschan, reian, bragian, èn malsangs, leghers, trests e tot chegl tgi totga tar la veta sociala dad en unfant. Els èn adegna lò, 24 ouras an de e 365 deis ad onn. Angal per la scola vonigl orsoura. Els furman ena gronda famiglia. E chesta famiglia ò er ena mamma e chella è Patricia. «Els vignan cun tot tar me, scu tgi ins vo tar la mamma. Cun lour chitos, cun lour plascheirs, cura tgi gl'èn trests e cura tgi lessan mussar lour plascheir. Ia va dad esser cò 24 ouras e set deis l'emda per els», dei Patricia Scarpatetti. Ella so bagn avonda tge derivanza tgi chels unfants on ed or da tge relaziuns tgi ella igls ò piglia. Savens sotnutrias, savens traumatisos antras violenza ed alcoholissem ainten famiglia, noua tgi mantgeva ad els igl pi basignevel tgi en

unfant dovra. «I vo betg angal per dar ad els en tetg ed ensatge damagler. I vo savens per dar puspe fi ad en cor tgi era stido. I vo per dar ad els igl sentimaint tgi els seian ensatgi e dar anavos igl plascheir da veiver», rachinta la donna da Cunter e veuple vei ella tgi chegl tgi ella ò mess an peis a Honduras e surpiglia la responsablada ansemen cun igl sies partenari Edwing, è en pensum per la veta.

En angaschamaint total

Taimp liber dattigl betg bler per Patricia: «Mintgatant ma teira anavos per diesch minutas ainten en cantung dalla tgesa per esser suletta. Ins dovra er magari en gnoul taimp per sasez», manegia la donna da Cunter. Ella vegia er gio stibgia da piglier ena abitaziun ordvart la tgesa d'unfants, ma... Chesta stad è Patricia stada durant seis emdas anavos an Svizra, a Cunter. En po per far vacanzas e sa revigneir scu er per star tigl sies genitours e far visitas tar chellas persungas tgi statan ad ella manevol. Ma chel taimp ò ella er nizigia per far visitas persunalas e tgirar igl contact tar sponsors e donatours. Digl reminent ò ella er gia cun ella an Svizra en unfant pitschen da mianc en onn, Juan Carlos. Quasi scu en agen.

E durant igl taimp tgi ella è stada an Svizra ò ella er survagnia ena bunga novitad. Josue Alexander è en unfant impedia tgi è tar els an tgesa. Atgnamaintg peglian els betg unfants impediessend tgi gl'èn betg indrizzos persiva. Ma damais tgi gio igl frar e la sora eran lò, ins ò lia tigneir ansemen la famiglia u migler detg igls fardagliuns. Josue ò seis onns. Ed en de ò Patricia survagnia da San Pedro Sula per e-mail en video tgi mossa scu tgi Josue geva e pe. «Chegl èn muments tgi remunereschan bler per tot igl angaschamaint tg'ins ò», declera Patricia glischond sur l'antiera fatscha. E per ella ena gronda satisfacziun è er da cumparagler l'igleida veida da chels unfants traumatisos tgi els on piglia «se dalla veia», cun l'igleida e l'expressiun cuntainta tgi els on oz.

Ed anavant...

Antras la tgesa «yo quiereo ser...» on unfants survagnia betg angal en datgesa, mabagn er perspectivas per la veta. Els dastgan avoir semis. E semis ò er Patricia Scarpatetti an connex cun igl sies project. Ella pigless tiers igls unfants tgi èn gio lò anc 10 – 15 unfants pitschens. Pinavant indrizzess ella er gugent luvratoris per dar er en ageid u ena scolaziun manuala agls unfants tgi fiss er ensatge fitg impurtant per lour avigneir.

En problem tgi ins ò er cun igls unfants è, tgi da chels 32 èn 11 sainza idenditad. Vot deir els on

nigna derivanza documentada, on nigla testificaziun da naschientscha e cotras er nigla indicaziun exacta dalla vigliadetna. «Naturalmaintg vainsa do er ad els en de da naschientscha, uscheia tgi son er festivar anniversari», menziunescha Patricia scu angal ena pitschna part digl problem.

Ed alloura en problem tgi niro pir: igls unfants na son betg star ainten la tgesa «yo quiereo ser...» per veta durata. Cura tg'els on 18 onns ston els bandunar ed eir or e star sen atgnas tgommas. E cò è l'antieriura scolasta bagn consciainta tgi chel pass vign ad esser per mintgign dad els en mument fitg impurtant e magari decisiv. Quant spert fiss ena matta an speranza e quant spert fiss ella ed igl sies unfant anavos ainten la misergia tgi ella è stada eneda. E perchehl ègl fitg impurtant da parager bagn igls unfants sen chel mument tgi els ston sgular or aint igl mond!

Chels tgi cattan igl project da Patricia Scarpatetti bung e lessan er sustigneir chel an ena furma u l'otra son far donaziuns spontanias u er lieidas ve dad ena investiziun speziala. Ins pò er surpiglier en padrinadi per en unfant tgi costa 200.– fr. ad onn e cotras è sierada la finanzaziun dalla scola per chel unfant durant aglmanc dus onns. Igl contact da banca per donaziuns è: IBAN CH56 0077 4010 0886 5740 0.



Ainten igl clima tropic da Honduras dovraan igls unfans betg blera vistgadeira. Chella reiva ple u manc totta dalla Svizra.